



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“, broj: 96/13 i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“, broj: 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2019. GODINU HRVATSKE STRANKE BOSNE I HERCEGOVINE

Broj: 03-07-6-427/20
Sarajevo, 09.09.2021. godine

S A D R Ź A J

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet pregleda i kontrole.....	5
Cilj pregleda i kontrole	5
Obim pregleda i kontrole	5
4. PRETHODNE KONTROLE I REVIZIJE	5
5. NALAZI I PREPORUKE	6
5.1 NALAZI.....	6
5.2 PREPORUKE	9

MIŠLJENJE REVIZORA

Služba za reviziju finansiranja političkih stranaka je izvršila pregled godišnjeg finansijskog izvještaja Hrvatske stranke Bosne i Hercegovine za 2019. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2019. godinu, utvrđeno je da je Hrvatska stranka Bosne i Hercegovine prekršila odredbe člana 4. stav (1), člana 11. stav (1) i člana 12. stav (4) Zakona o finansiranju političkih stranaka.

Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Hrvatske stranke Bosne i Hercegovine za 2019. godinu.

Pregled i kontrola finansijskih izvještaja provedeni su u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Hrvatska stranka Bosne i Hercegovine se finansirala iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica (3-a)	0,00	0,00
3.	Prilozi pravnih lica (3-b)	0,00	0,00
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	0,00	0,00
7.	Prihodi iz budžeta (3-f)	15.877,46	39,65
8.	Prihodi od propagande (3-g)	0,00	0,00
I	Ukupni prihodi (1-8)	15.877,46	39,65
II	Ostali prihodi i drugo	24.167,24	60,35
	Izvori finansiranja (I+II)	40.044,70	100,00

U godišnjem finansijskom izvještaju stranka je iskazala rashode u ukupnom iznosu od 24.611,56 KM¹.

2. PREDSTAVLJANJE POLITIČKE STRANKE

Naziv političke stranke: Hrvatska stranka Bosne i Hercegovine. Skraćeni nazivi stranke su: Hrvatska stranka BiH i HS BiH.

Politička stranka HSS-NHI je Rješenjem, broj: 065-0-Reg-08-001502 od 16.05.2008. godine upisana u registar kod Općinskog suda u Sarajevu, kao pravni sljednik Hrvatske seljačke stranke BiH i Nove hrvatske inicijative. Rješenjem Općinskog suda u Sarajevu, broj: 065-0-F1-14-000001 od 17.04.2014. godine, upisana je promjena sjedišta i naziva stranke u Hrvatski narodni savez BiH. Rješenjem Općinskog suda u Sarajevu broj: 065-0-F1-17-0000009 od 05.07.2017. godine Hrvatski narodni savez je promijenio naziv, pa je ova politička stranka upisana pod novim nazivom Hrvatska stranka Bosne i Hercegovine.

Sjedište stranke je u Sarajevu, Petrakijina 2.

Lice ovlašteno za predstavljanje i zastupanje stranke u 2019. godini je Božo Skopljaković, predsjednik.

Lice ovlašteno za podnošenje finansijskih izvještaja za 2019. godinu je Branimira Almaš.

¹ Podaci iz ispravljenog obrasca 4 (rashodi političke stranke) godišnjeg finansijskog izvještaja za 2019. godinu, koji je dostavljen dana 10.06.2021. godine.

Prema podacima iz godišnjeg finansijskog izvještaja za 2019. godinu, Hrvatska stranka Bosne i Hercegovine ima sljedeću organizacionu strukturu:

- Središnji ured,
- 3 županijska odbora,
- Regionalna organizacija Doboj-Derventa i
- 18 općinskih organizacija.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Hrvatske stranke Bosne i Hercegovine za 2019. godinu.

Cilj pregleda i kontrole je da revizor na bazi finansijskih izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskih izvještaja Hrvatske stranke Bosne i Hercegovine obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskim izvještajima sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava.

4. PRETHODNE KONTROLE I REVIZIJE

Služba za reviziju je, zaključno sa finansijskim izvještajima za 2007. godinu, obavila pregled i reviziju pojedinačnih finansijskih izvještaja političkih stranaka Hrvatske seljačke stranke BiH i Nove Hrvatske inicijative, koje su se tokom 2008. godine ujedinile u političku stranku HSS-NHI. U periodu od 2008. do 2018. godine Služba za reviziju je obavila reviziju i pregled finansijskih izvještaja HSS-NHI, Hrvatskog narodnog saveza BiH, odnosno Hrvatske stranke Bosne i Hercegovine, nakon čega su izdati izvještaji o reviziji, odnosno izvještaji o pregledu sa mišljenjem revizora, nalazima revizije i preporukama.

Nakon obavljenog pregleda godišnjeg finansijskog izvještaja za 2018. godinu, izdat je Izvještaj sa nalazima revizije i preporukama stranci da prije početka poslovne godine donosi program utroška sredstava, te da finansijska sredstva osigurana za finansiranje političke stranke koristi u skladu sa tim programom, da novčane priloge, ukoliko ih primi u gotovini, uplaćuje na transakcijski račun na način kako je propisano članom 5. Zakona o finansiranju političkih stranaka, da poslovne knjige vodi u skladu sa računovodstvenim propisima, da u poslovnim knjigama uspostavi potpune i tačne evidencije o sredstvima, potraživanjima, rashodima i obavezama političke stranke, da sve finansijske izvještaje Centralnoj izbornoj komisiji Bosne i Hercegovine podnosi u zakonom propisanim rokovima i popunjava u skladu sa podzakonskim aktima koje je donijela Centralna izborna komisija Bosne i Hercegovine i da dostavlja dodatnu finansijsku dokumentaciju. Hrvatskoj stranci Bosne i Hercegovine posebno je preporučeno da izvrši popis imovine, potraživanja i obaveza političke stranke, da utvrdi njihovo stvarno stanje, te da u poslovnim knjigama izvrši usklađivanje knjigovodstvenog sa stvarnim stanjem.

Nerealizovane preporuke:

Na osnovu uočenih nedostataka u godišnjem finansijskom izvještaju za 2019. godinu, utvrđeno je da politička stranka nije ispoštovala preporuke revizije.

5. NALAZI I PREPORUKE

5.1 NALAZI

a) Hrvatska stranka Bosne i Hercegovine prekršila je odredbe člana 4. stav (1) Zakona o finansiranju političkih stranaka.

Hrvatska stranka Bosne i Hercegovine je u ispravljenom godišnjem finansijskom izvještaju za 2019. godinu iskazala rashode u ukupnom iznosu od 24.611,56 KM.

Hrvatska stranka Bosne i Hercegovine nije uz godišnji finansijski izvještaj za 2018. godinu Centralnoj izbornoj komisiji Bosne i Hercegovine dostavila program utroška sredstava za 2019. godinu.

Dana 19.10.2021. godine, Hrvatska stranka Bosne i Hercegovine je Centralnoj izbornoj komisiji Bosne i Hercegovine dostavila Finansijski izvještaj za period 01.01.2019.-31.12.2019. godine sa tabelama u kojim su sadržani podaci o izvršenju plana, bez datuma, potpisa i pečata, što ne predstavlja program utroška sredstava za 2019. godinu. Stranka je, takođe, dostavila Zaključke sa sjednice Glavnog odbora stranke od 08.07.2019. godine na kojoj je usvojen Finansijski izvještaj za 2018. godinu, te Finansijski plan za 2019. godinu, ali uz isti nije dostavila finansijski plan za 2019. godinu.

Nakon Preliminarnog izvještaja o pregledu godišnjeg finansijskog izvještaja za 2019. godinu, stranka je dostavila Odluku o planu prihoda i rashoda za 2019. godinu broj: 01-20-1/19 od 08.07.2019. godine iz koje je utvrđeno da su rashodi planirani u ukupnom iznosu od 22.028,00 KM.

Pregledom finansijskog izvještaja i finansijske dokumentacije, utvrđeno je da je politička stranka sredstva utrošila mimo Odluke o planu prihoda i rashoda za 2019. godinu, kako slijedi:

- stranka nije planirala ostale nematerijalne troškove, rashode prethodnih godina, troškove goriva i maziva, troškove ugovora o djelu i troškove advokatskih usluga i sudskih troškova. Prema podacima iz ispravljenog godišnjeg finansijskog izvještaja za 2019. godinu, stranka je u toku godine ostvarila ostale nematerijalne troškove u iznosu od 50,00 KM, rashode prethodnih godina u iznosu od 143,10 KM, troškove goriva i maziva u iznosu od 447,69 KM, troškove ugovora o djelu u iznosu od 417,01 KM, i troškove advokatskih usluga i sudskih troškova u iznosu od 1.263,60 KM.;

- stranka je planirane troškove bruto plata prekoračila za 191,76 KM, troškove naknada za topli obrok, prevoz, regres i sl. za 300,00 KM, troškove internata za 78,65 KM, a troškove vode za 173,05 KM.

Stranka je u Odluci o planu prihoda i rashoda za 2019. godinu troškove bruto plata planirala u iznosu od 10.800,00 KM, dok je iste ostvarila u iznosu od 10.991,76 KM. Troškove naknada za topli obrok, prevoz, regres i sl. stranka je planirala u iznosu od 2.436,00 KM, a iste je ostvarila u iznosu od 2.736,00 KM. Stranka je troškove interneta planirala u iznosu od 351,00 KM, a ostvarila u iznosu od 429,75 KM. U godišnjem finansijskom izvještaju stranka je iskazala troškove vode u iznosu od 377,05 KM, a isti su planirani u iznosu od 204,00 KM.

S obzirom da je Hrvatska stranka Bosne i Hercegovine finansijska sredstva utrošila mimo svog plana prihoda i rashoda, prekršila je odredbe člana 4. stav (1) Zakona o finansiranju političkih stranaka.

b) Hrvatska stranka Bosne i Hercegovine prekršila je odredbe člana 11. stav (1) i člana 12. stav (4) Zakona o finansiranju političkih stranaka.

Pregledom godišnjeg finansijskog izvještaja, utvrđeno je da Hrvatska stranka Bosne i Hercegovine godišnji finansijski izvještaj nije podnijela u zakonom propisanom roku, te poslovne knjige nije vodila i Završni račun za 2019. godinu nije podnijela u skladu sa računovodstvenim propisima, čime je prekršila odredbe člana 11. stav (1) i člana 12. stav (4) Zakona o finansiranju političkih stranaka.

(1) Hrvatska stranka Bosne i Hercegovine je godišnji finansijski izvještaj za 2019. godinu podnijela nakon zakonom propisanog roka², čime je prekršila odredbe člana 12. stav (4) Zakona o finansiranju političkih stranaka.

Stranka je godišnji finansijski izvještaj za 2019. godinu podnijela elektronski, putem aplikacije „FI CIK BIH” dana 12.05.2020. godine, a obrasce finansijskog izvještaja, odštampane iz aplikacije u PDF formatu, ovjerene potpisom ovlaštenog lica i pečatom političke stranke dostavila je Centralnoj izbornoj komisiji Bosne i Hercegovine dana 13.05.2020. godine.

Takođe, uvidom u Završni račun za 2019. godinu koji je Hrvatska stranka Bosne i Hercegovine dostavila Centralnoj izbornoj komisiji Bosne i Hercegovine 10.12.2020. godine, utvrđeno je da je stranka Završni račun za 2019. godinu podnijela Finansijsko-informatičkoj agenciji tek 03.12.2020. godine, što je suprotno računovodstvenim propisima.

(2) U godišnjem finansijskom izvještaju, ispravljenom obrascu 5 (obaveze) stranka je iskazala obaveze u ukupnom iznosu od 7.866,11 KM, što ne odgovara podacima iz poslovnih knjiga. Naime, u poslovnim knjigama i Završnom računu za 2019. godinu stranke je iskazala kratkoročne obaveze u iznosu od 13.599,83 KM.

Uvidom u poslovne knjige utvrđeno je da je stranka u poslovnim knjigama iskazala obaveze prema nižim organizacionim dijelovima stranke po osnovu pomoći u ukupnom iznosu od 5.733,72 KM, što ukazuje da poslovne knjige ne prikazuju realno stanje obaveza, a što je navedeno i u Izvještaju o pregledu godišnjeg finansijskog izvještaja za 2018. godinu.

Stranka nije u poslovnim knjigama trebala iskazati obaveze prema nižim organizacionim dijelovima stranke jer nije riječ o obavezama stranke, već o internim odnosima unutar političke stranke.

5.2 PREPORUKE

Preporučuje se Hrvatskoj stranci Bosne i Hercegovine da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- ***da finansijska sredstva obezbijedena za finansiranje političke stranke koristi u skladu sa programom utroška sredstava,***
- ***da poslovne knjige vodi i finansijske izvještaje podnosi u skladu sa računovodstvenim propisima i***
- ***da finansijske izvještaje podnosi u zakonom propisanim rokovima.***

² Do 31.3. naredne godine politička stranka podnosi finansijski izvještaj u formi koju odobri Centralna izborna komisija Bosne i Hercegovine.

KOMENTAR:

U ostavljenom roku, Hrvatska stranka Bosne i Hercegovine očitovala se na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2019. godinu. Uz očitovanje stranka je dostavila korigovane obrasce 4 i 5 godišnjeg finansijskog izvještaja i traženu dodatnu dokumentaciju, čime je djelimično otklonila utvrđene nedostatke.

Pored navedenog, Hrvatska stranka Bosne i Hercegovine dostavila je i Odluku o planu prihoda i rashoda za 2019. godinu, koju je Služba za reviziju razmotrila i u formi nalaza ugradila u Konačni izvještaj o pregledu godišnjeg finansijskog izvještaja za 2019. godinu.

Šef Odsjeka za revizijske poslove, revizor

Sanja Tošović

Šef Službe za reviziju

Mr. sc. Hasida Gušić